



S'isteddu cun sa coa

NARRADORE:

E totu in una, in su chelu nieddu, amus bidu totu custos isteddos... Sunt riende cuntentos, ca ischint chi in sa gruta de Betlemme b'est nàschidu su Bambinu, Gesùs. Ma un'isteddu est pranghende... E pro ite at a èssere?

Isteddu 1:



Apo ischidu una nova...

Isteddu 2:



Deo puru.

Isteddu 3:



E cale nova?

Isteddu 1:




Chi nant·chi in Betlemme b'at nàschidu unu pitzinnu chi nant·chi at a èssere Deus.

Isteddu 3:



Ite cosa bella... E chie ti l'at narada?



Isteddu 2:



A mie un'Ànghelu.

Isteddu 1:



E nant-chi at a èssere in una gruta frita che nie, e nant-chi l'ant a àere postu in una mandigadòrgia.

Isteddu 3:



Ea, abbaidade! Custu isteddu est pranghende... Nara, e pro ite ses pranghende, tue?



Isteddu 4: (Pranghende a sucùtidu)

Ca m'at essidu una coa...

Isteddu 1, Isteddu 2 e Isteddu 3 (ispantados):



Ea oh!!! Portat una coa de s'aberu!!!




Isteddu 4 (sighende a prànghere):

Mi dat tropu infadu, non faghet a camminare.

Ànghelu:



Machillotu, non pranghes, ca custa coa chi t'est essida serbit a inditare su caminu a chie cheret andare a bìdere a su Bambinu.



Isteddu 4: (assutende·si sas làgrimas)

E deo chi mi nde la cheria istratzare...



Ànghelu:

Comente!!! Finas sos Tres Res sunt isetende a tie pro imparare su caminu...



Isteddu 4:

A cosa bella, oh! So tropu cuntentu!

NARRADORE:

S'isteddu cun sa coa mustrat su caminu a sos pastores e a totu sa gente chi cheret andare a Betlemme, e intantu in sa gruta...



AINEDDU:

Ite belligheddu chi est custu pitzinnu!!!



BOE:

Tocat a lu cheghentare, ca tenet fritu...



AINEDDU:

Acùrtzia a inoghe, a li cheghentare sas manos e sos pees.



BOE:

A li cantamus una cantzone, pro lu dormire?

CANTZONE

NARRADORE:

Sunt acudende sos pastores e sa gente de su logu, e sunt arrivados finas sos Tres Res.



NOSTRA SEGNORA:

Acudide a inoghe, a bìdere a Deus pitzinnu.



PRIMU PASTORE:

Ea, unu pagu de late l'apo batidu.



SEGUNDU PASTORE:

E deo unu pagu de casu.



GASPARE, BALDASSARRE E MERTZIORO:

E nois puru amus batidu carchi donu pro festare a su Re de su mundu chi est nàschidu oe.

